



新畫山脈圖志

ル 5  
3546  
5



門 5  
號 3546  
卷 5

新疆山脈圖志卷五

新城王樹枏

北山之首曰哈喇古顏之山其陽喀什河水出焉西南流入於伊犁河

西城圖志哈喇古顏鄂拉在額布圖達巴西北二百里晶郭勒南喀什郭勒發源南麓山脈自額布圖達巴折北而西為天山分支至此孤峯聳豎西域水道記喀什河發哈喇古顏山南麓準語古顏謂股也山腰以下石色深黑故名湧泉成池菹

山脈五

陶

廬

澤星布蕩而西流數里賽里克察罕烏蘇自北來  
匯乾隆二十二年定邊將軍成袞札布奏侍衛烏  
爾登於六月初九日追賊尼瑪等由傅羅和羅山  
口即傅羅和洛山往什河源一路山險雪融泥淖難行是  
其地矣沿什河北岸皆伊犁圍場一水所匯爲  
一圍凡十圍以次而西賽里克察罕烏蘇之東卽  
第十圍也什河又西流六里布爾哈斯台水自  
南來匯圖爾根察罕烏蘇自北來匯乾隆二十三  
年叅贊大臣巴祿奏言搜剿瑪哈沁至札木巴拉  
布拉克之源哈喇沁叅領賽圖於圖爾根察罕烏

蘇勦賊四十餘人是也什河又西流十里阿布  
達爾摩多水自北來匯又西流五里哲里摩多水

自北來匯又西流五里阿爾斯朗圖布董水

蒙古語阿爾斯

自北來匯又西流十五里哲

明獅子也布董謂物之龐大者言其地之山巖大如獅之形

庫布董水自北來匯哲庫布董水西有無名水一

亦南流匯什河哲庫布董水西十里哈布齊克

布董水南流匯哈汁河又西十里烏里雅蘇台水

南流匯什河乾隆二十二年成袞札布奏言六

月初九日明瑞在額布圖

一作額卜推

嶺口遇賊千餘擊

之奪其寨追至額林哈畢爾噶之烏里雅蘇台河

賊人佔據山崖排列鎗礮在此水之側也喀什河  
又西五里喀喇河南流匯喀什河喀喇河東有無  
名水一其西有無名水四皆南流匯喀什河喀喇  
河西二十里巴爾加圖水南流匯喀什河巴爾加  
圖水東有無名水二亦南流匯喀什河諸水皆發  
自北山山無林木惟水道所行喬柯交蔭登高遙  
矚若蒼龍十餘蜿蜒南走奔赴巨壑空山豐草自  
成周陸每歲官兵行圍以習馳逐巴爾加圖南直  
特穆爾里克嶺嶺陰之水北流來匯喀什河又西  
傍北山流二十里經齊齊爾哈納托海營南隔岸

爲呼賴特穆爾里克嶺嶺趨而北河流漸隘喀什  
河經營西一里沙喇布拉克水自北來匯喀什河  
西流入峽又流十里經胡吉爾台嶺南哈克布阻  
水自北來匯南北山勢復開喀什河又西傍北山  
流十里呼濟爾吉爾瑪台水蒙古語呼濟爾謙也言謙地而水有小魚自北  
來匯又西傍北山流十里察察吉爾瑪台水自北  
來匯喀什河又西傍北山流二十里稍折而南摩  
多圖吉爾瑪台水自北來匯三吉爾瑪台水獨此  
有林木其山四面高阜中平曠周十餘里將軍頓  
宿於茲水來自山東北隅峽中澄清無滓余與領

隊大臣布君彥泰策馬峽中溯流十里孱顏積黛  
蒙籠撥雲幽討造深賞心斯契垂綸投餌白小盈  
筐水自峽出南流經將軍營東自山東南隅峽出  
峽長里許怪石猙獰纍纍塞路激湍環曲琴筑齊  
鳴水達山外南流數里滙喀什河傍南山流其南  
曰烏圖嶺又西七十里經都爾伯勒津回莊南自  
甯遠城以東三百里皆回民田迄此莊而止乾隆  
二十年叅贊大臣策楞奏言諾爾布林沁擊敗阿  
巴噶斯等欲整兵進勦而塔本集賽黨惡據險恐  
爲夾攻已移游牧於都爾伯勒津之地謂此也使

準噶爾行程記云自空格斯河六十里至都爾伯  
勒津又一百二十里至策妄阿喇布坦游牧今自  
空格斯行者空格斯河岸十里至烏圖嶺越嶺西  
北行二十里渡喀什河河北岸渡口曰察罕拜牲  
自此西北行五十里至都爾伯勒津莊其西百二  
十里在蘇布台蒙古語凡有穴者曰蘇布台以東山勢平敞宜爲準  
部駐牧之所

案新疆圖說云喀什河源出博和拉亦名大蒙  
柯圖水博和拉西距甯遠城五百七十六里大  
蒙柯圖山西距甯遠城四百九十里西域圖志

通謂之哈喇古顏山十二圍場山水有曰哈喇  
果勒者卽哈喇古顏之轉音也今人通呼哈什  
河所出之山爲哈什山山脈自汗騰格里山東  
行五百里折而東北一百一十里至額布圖嶺  
由此東行爲天山正幹其西北一支由哈喇古  
顏山西北行折而東北卽伊塔諸山魏源北幹  
考所謂由伊犁博羅塔河之西遶額爾齊斯河  
宰桑泊之東北而起阿爾泰山者也

又西北曰呢勒哈之山呢勒哈水出焉南流入於哈什  
河

西域水道記呢勒哈水發自呢勒哈山蒙古語謂  
幼孫曰呢勒哈也其山東西兩阜張股如箕水傍  
西阜之左南流達山外溉回民田瀦爲水磨經回  
莊滙於哈什河乾隆二十三年定邊將軍兆公惠  
奏言博羅布爾噶蘇嶺內呢勒哈有布古魯特之  
瑄齊二百餘戶居住臣派瑚爾起率兵四百往至  
呢勒哈河遇遷移游牧圍殺四五十人瑄齊等登  
山乞降卽此東西阜矣

案呢勒哈山在木託圖水之西額林莫多水之  
東都爾伯勒津回莊西北

又西北曰吉勒蘇胡之嶺額林莫多水逕其東入於哈什之河

西域水道記哈什河又西經吉勒蘇胡嶺南蒙古

語吉勒蘇胡謂日光晃眼也額林摩多水自嶺東

來滙嶺南數里懸崖聳峭危石倚空哈什洪濤衝

齧其趾攀援如蟻臻其絕頂路轉山回劣容馬足

山中石璞往往鐫科木什木博第薩都佛呪即華言觀音呪

唵嘛呢叭綽克圖贊丹經大旨言瞻拜如來三十五

尊佛得解罪孽往生極樂又有求福於松喀巴喇

嘛華言達摩也發願之詞曰米克哲木皆蒙古書或唐古

忒書厄魯特人云昔準部時山水暴溢數致災害

勒石此山害遂止絕相傳是五百年物余與從者

就馬上携數石歸番僧見之輒先頂禮哈什河又

西流胡吉爾台水自北來滙又西流三十餘里烏

里雅蘇圖水自北來滙胡吉爾台迄於烏里雅蘇

圖連岡疊巘土皆赤緹山巔崩圯溜痕宛然麓有

碎石搏結堅實正圓如甕各有嵌石石鑿番字與

吉勒蘇胡嶺石相同考驗厥狀蓋怒濤挾沙團積

成阜禳災之說或不誣矣

又西北曰博羅布爾噶蘇之山有水焉西南流入於哈

什河

西域圖志博羅布爾噶蘇鄂拉在哈喇古顏鄂拉西一百里入東谷口西行三十里爲覺羅托海又西南一百一十里爲額博爾濟達巴又西九十里爲塞特爾台哈喇海其地皆在山谷中又九十里出西谷口於是全山之形勢始盡乾隆二十二年六月將軍成袞札布遣副都統由屯等窮追逆賊呢瑪至額博爾濟達巴口擒之殲其眾二百餘獲馬駝牛羊七百餘所部乃平西域水道記博羅布爾噶蘇水發自博羅布爾噶蘇山南流折而東經

將軍營復西南流有泉發自營西復南流來匯其西南達谷外疏爲渠溉回民田復西南匯於哈什河哈什河北岸大山綿亙數百里以博羅布爾噶蘇爲門戶扎拉豐阿傳云乾隆二十年四月偵達瓦齊居察卜齊雅勒扎拉豐阿偕薩喇勒由博羅塔拉馳赴博羅布爾噶蘇奪隘口抵登努勒台沙喇扣肯傳云阿睦爾撒納爲大軍所迫竄哈薩克巴圖爾烏巴什覬據伊犁轄四位拉特聞我師有備竄察罕烏蘇博羅布爾噶蘇阿勒坦特卜什勒卜什沙爾海諸境是知爲伊犁東境要害矣



案準語博羅布爾噶蘇地多青柳也新疆圖說云博羅布爾噶蘇水源出登努勒台山伊犁鄉土志謂登努勒台與博羅布爾噶蘇山連界在府城東一百九十餘里故誤以博羅布爾噶蘇水爲出於登努勒台也乾隆二十七年伊犁辦事大臣阿公桂疏言前者臣等奏明今秋添設額林哈畢爾噶路軍臺自晶河博羅布爾噶蘇登努勒台一帶至伊犁安設適今年二月晶河運送籽種以登努勒台雪大難行訪之厄魯特乃由塔勒奇嶺賽喇木淖爾庫森木什克等處

而來塔勒奇嶺山路較博羅布爾噶蘇嶺爲平正秋雪亦較登努勒台爲少惟水大之時略有未便而彼處有噶勒丹策凌時舊橋數處修其損壞可免病涉所有軍臺改由塔勒奇至托里

準語托里鏡也

六處安設從之據此則博羅布爾噶蘇山較塔勒奇爲尤險矣此山當哈什山盡處再西

則滙合洛斯水南流合於伊犁大河

又西北曰塔勒奇之山陰爲賽里木湖周一百里雪峰環之水色激滋隕籜噍羽不入於波夜有赤光上燭霄漢名曰淨海有神羊焉色青而大角見則雨雹其樹多

林禽松樺楠柳多茶多藥草多禮鼠元獺有物焉狀如  
常鼠厥名曰鼯有鳥焉綠身而長尾與鼠同穴厥名曰  
鯨其西庫色木蘇克一作庫森之水出焉東北流注於布  
勒哈齊淖爾即喀喇塔拉其南塔勒齊之水出焉西南流  
注於伊犁河其中多白魚鯊魚

西域圖志塔勒齊鄂拉在博羅布爾噶蘇鄂拉西  
北山形迤邐西南相屬庫色木蘇克郭勒發源西  
麓塔勒齊郭勒發源南麓其東谷口在察罕拜牲  
城西七十里托里西一百二十里南谷口距東谷  
口一百八十里由南谷口外一百里至伊犁郭勒

北岸之阿里瑪圖為博羅塔拉之南山踰山而南  
即哈什空格斯地乾隆二十八年秩於祀典每歲

春秋致祭

西遊記重九日至回紇昌八刺城翌日並陰山而  
西約十程又度沙場其沙細遇風則流狀如驚濤  
乍聚乍散寸草不萌車陷馬滯一晝夜方出蓋白  
骨甸大沙分流也南際陰山之麓踰沙又五日宿  
陰山北詰朝南行長坂七八十里抵暮乃宿天甚  
寒且無水晨起西南行二十里忽有大池方圓幾  
二百里雪峰環之倒影池中師名之曰天池沿池

正南下左右峰巒峭拔松樺陰森高踰百尺自顛  
及麓何啻萬株眾流入峽奔騰洶湧曲折彎環可  
六七十里二太子扈從西征始鑿石理道刊木爲  
四十八橋橋可並車薄暮宿峽中翌日方出入東  
西大川水草豐秀天氣似春稍有桑棗九月二十  
七日至阿里馬城鋪速滿國王暨蒙古塔刺忽只  
領諸部人來迎宿於西果園土人呼果爲阿里馬  
蓋多果實以是名其城其地出帛目曰禿鹿麻蓋  
俗所謂種羊毛織成者時得七束爲禦寒衣其毛  
類中國柳花鮮潔細軟可爲綫爲繩爲帛爲綿農

者亦決渠溉田土人惟以瓶取水戴而歸及見中  
原汲器喜曰桃花石諸事皆巧桃花石謂漢人也

程廷尉同文云晶河城東至托多克積沙成山浮澀難行東距阜康縣干  
一百里故云十餘程其間亂流而過當有洛克倫河呼圖壁河瑪納斯河  
烏爾烏蘇河記不顯言塞外之雪山雪所融夏日盛漲過時則涸九月正  
水竭之時蓋不知有河也自托多克過晶河山行五百五十里至賽喇木  
淖爾東岸淖爾正圓周百餘里雪山環之所謂天池海並淖爾南行五十  
里入塔勒奇山峽諺云果子溝溝水南流勢甚湍急架木橋以度車馬破  
長六十里今爲四十二橋卽四十八橋遺址出塔勒奇山口南行百七十  
里至惠遠城乾隆二十八年建今日伊犁城阿里馬城或卽在阿里馬圖  
河側阿里馬圖河在供宸城東北出塔勒奇山口至阿里馬圖河僅百里  
湛然居士集有從容菴錄序末題曰甲申元日漆水移刺楚材晉卿序於  
西域阿里馬城又西遊記歸途云三月二十三日宣差阿狗餞於吹沒  
葦之南岸又十日至阿里馬城西百餘里濟大河四月五日至阿里馬城  
之東園翌日晚抵陰山前宿又明日復渡四十八橋緣溪上五十里至天  
池海東北過陰山後行二十二日方接原歷金山南大河驛路徐松云其  
歸途渡那林河而直北由特默爾圖淖爾之西以達吹河之南乃轉而東  
北渡伊犁河其渡處在察林渡之東故百餘里卽至阿里馬城自阿里馬

城出塔勒奇山口經賽喇里水淖爾與往時程同過賽喇木淖爾不復東折而東北行其分路處在干珠罕卡倫地東北山行由沁達蘭至阿魯沁達蘭入塔爾巴哈台界以至原歷之金山大河驛

西使記過龍骨河復西北行與別失八里南北相直近五百里河西注瀦為海約千餘里曰克色勒伯頁多魚可食有礮磴以水激之行漸西有城曰訥衰又西南行過孛羅城所種皆麥稻山多柏不能株絡石而長城居肆圍間錯土屋牕戶皆琉璃城北有海鐵山風出往往吹行人墮海中西南行二十里有關曰鐵木兒懺察守關皆漢民崎嶇似棧道出關至阿里麻里城

西遊錄過瀚海千餘里有不喇城

李光庭西域圖考云不喇城即西使記孛羅城

之轉音城南有陰山即松樹頭嶺山頂有池今賽喇木泊在四山之中即其地也

不喇南有陰山東西

千里南北二百里

西遊記云初在沙陀北南望天際若銀霞問之左右皆未詳師曰多是陰山翌日過沙陀遇樵

者再問之皆曰然李光庭曰自阿拉突山之脈北繞西至伊犁北山東至阜康縣之博克達山皆曰陰山西遊記所云東西千餘里南北二百餘里

也山頂有池周圍七八十里池南樹皆林檎樹陰

翳鬱不露日色

西域水道記塔勒奇嶺為伊犁北境門戶塔勒奇城者以山名之也城在山南百里乾隆二十六年阿公桂所建新溝之西二十餘里曰果子溝谷長七十里北有峻嶺扼之嶺上多松名曰松樹頭嶺

嶺東有泉曰察察布拉克西流至谷中有紅水泉  
發自松樹頭嶺下來滙谷西山亦有水曰烏蘭烏  
蘇東南流來滙同南流經鄂博勒齊爾軍台西軍  
台距松樹頭三十里有庫爾齊布拉克水由東來  
滙又南流有烏博勒齊爾水由西來滙凡三十五  
里經塔勒奇卡倫又南流三里有將軍布拉克水  
由東來滙又南流二里經塔勒奇阿爾軍台東又  
南流里許遶谷外奔湍迅急聲聞數里谷中跨水  
架橋四十有二峭壁夾道蒼松據崖山鳥飛鳴林  
木陰翳入伊犁者驛程經此塞沙眯目頓覺清涼

迨乎初冬雨雪填谷行蹤斷絕又以是爲險隘也  
元長春邱真人西遊記云二太子扈從西征鑿石  
理道刊木爲四十八橋橋可並車東西大川水草  
豐秀天氣似春稍有桑棗案今伊犁絕無棗樹蓋四十八橋其  
來已舊今因其遺址爲四十二橋彼土不知遂謂  
前將軍保文端公所創惜於訪古矣賽里木淖爾  
當惠遠城正北二百里在松樹頭嶺下形南銳北  
豐南北一百二三十里東西五六十里又曰察罕  
賽喇木其水陽焊不耗陰霖不濫池中曾無片草  
及其風蘄鯤鱖子及皆所不生每日水潮若應子

午嘗有閩越流人善泅者欲探其淵入水數十武  
卽返言下有氣呼吸人不得住竟無能測其深也  
松樹頭嶺東一里建靖海寺寺極狀麗中祠龍神  
自寺東北行四十里至淖爾淖爾東南隅有三石  
島相接近南者最大廣近百步冬月海冰島乃可  
陟東岸數百步爲鄂勒著依圖博木軍台與干珠  
罕卡倫相去半里出入伊犁境者於此驗過余頓  
宿之暇步至海側沿波碎石不見纖草台兵言夜  
氣澄明天半懸一紅燈正臨海心疑爲神龍所宅  
矣傍淖爾東北隅有二小池居人謂之海耳海側

多獺發其穴則中通數窟每窟土基如牀牝牡偶  
居乳雛積穀別有異穴兼有鼠能拱立所謂禮鼠  
也又有鳥鼠同穴者鼠如常鼠鳥長尾綠身如鵲  
而小黎明鳥先出翱翔鼠蹲穴口顧望漸走平地  
鳥來集鼠背張翼以噪鼠往返馳而鳥不墜良久  
乃已是卽爾雅餘鼯郭景純言鳥鼠同穴山在隴  
西首陽縣以今驗之不僅渭源有此矣長春真人  
西遊記云晨起西南行約二十里忽有大池方圓  
幾二百里雪峰環之側影池中眞人名之天池於  
其歸也又云度四十八橋緣溪上五十里至天池

海卽此淖爾也勝境鍾靈淪於荒塞佳名淹沒授  
討無人嘉慶四年洪先輩亮吉戍伊犁往返經此  
作淨海贊其序云未至三合有水焉廣闊可五百  
步深至無底有島嶼無委輸不生一物不染一塵  
投以巨細頃刻必漂流上岸土人稱爲西方淨海  
譯言賽喇木淖爾是也余自烏魯木齊以來盥沐  
久廢又欲休馬力日步行半程足以繭栗驟聆此  
名愧我塵垢爰稅駕路側餐白雪以洗心藉行潦  
而盥手然後進焉則見百樹之葉隨雲外馳四山  
之禽孽叢東邁若有所避不容稍遲心始異之乃

抵其境則西南北三面盡皆雪山中波外沙儼然  
分界流旣百折綠若再染怪石林立頽峰斂容晷  
刻已移心形並澈歸途則又值仲夏上旬涼風肅  
肅弦月欲落携此枕簟坐卧岸側不復就舍館矣  
山寡別木惟松之聳而上者岸乏雜草惟芝之翠  
而圓者塊坐無事因歷數字內靈川秀壑笠屐所  
至者或同茲幽奇實遜此邃潔誠西來之異境世  
外之靈壤矣

新疆識略乾隆二十九年北路大軍由波羅塔拉  
越塔勒奇嶺進勦嶺險峻如關谷中林木茂密俗

呼爲果子溝嶺下出泉匯爲大河經流谷中往來者分遶水之東西自松樹頭至山口凡橋四十二座

林則徐荷戈紀程壬寅十一月初六日庚戌黎明大風天陰過一卡倫循海子而西沿途風濤之聲四十里松樹頭海子始盡兩山劈開千松挺立行人謂之過達般不知其名考前人記載當是塔爾奇山大雪飄洒有店小坐雪稀過山山爲行者所憚實不甚峻東來上山少下山多西來則反是矣下後峰迴路轉俗名果子溝寶塔爾奇溝也祁鶴

皋先生行記稱奇絕仙境如入萬花谷中值冬濃碧嫣紅不可得見而沿山松樹重疊不可計數雪後巖白松蒼天然圖畫古徑幽折泉溜清冷二十里中步步引人入勝誠不僅作山陰道上觀也過橋十餘道二台宿晚雪霽

洪亮吉天山客話果子溝四月間百花競放異鳥成羣鳴聲上下過其下者遇風日清華輒有出塵之想

方士淦東歸日記道光戊子三月十八日四十里至頭台進果子溝又四十里住二台果子溝兩山



矗立松樹參天中有澗溪一道迤邐盤曲小橋四十二道石壁巉巖青綠相間人在畫中行山景之佳甲於關外保文端修平山路利賴至今余丙戌子月過此大雪瀰漫半夜始到二台停車達巴上度夜但見松林茂密野獸奔馳冰塞長沙雪滿羣山爲平生所僅見十九日二十里出果子溝上達坂有伊犁前巡檢顏謨立碑一座紀保公功德嘉慶三年立往來行人過達坂者無不下馬而拜散擲錢文口外之俗如此至松樹頭走海子卽賽里木淖爾沿海子周圍數百里四山環遶眾水所歸

天光山色高下相映澄鮮可愛中有海島內有海眼通大海有海馬人常見之又八十里盡山路靠海沿而行往四台亦有碑與前碑同

新疆圖說塔勒奇山在綏定城北一百八十里伊犁鄉土志塔勒奇山卽今果子溝一帶大山由賽里木淖爾南岸之松樹頭卡起西至霍爾果斯邊界止綿亙二百餘里山陽豐草平林清溪滌帶向爲官牧場西通現分俄界大道南出山溝通府屬河北九城爲此地主山後路咽喉要隘

案準語塔勒奇柳樹也方略作闕厄奇山中四

十八橋乾隆時經保文端公因其遺址爲四十  
二其六道橋峭壁懸崖寬纔十尺每值春融雪  
霽或逢陰雨連綿橋輒爲水所冲折行旅視爲  
畏途光緒丙申伊犁將軍馬亮傍山鑿石新開  
一路化險爲夷其餘僅存小橋七大橋十一英  
人雜記謂他魯稽山路即塔勒奇之轉音爲通蒙古中央  
亞西亞之道東由烏魯木齊北由塔爾巴哈台  
會於庫爾喀喇烏蘇此山實扼通伊犁之咽喉  
最爲要道案中俄分界以來伊犁重門洞開無  
天險可扼而塔勒奇一路實當東北之衝平定準

噶爾勒銘伊犁碑所謂波羅塔拉闡爾奇嶺險  
如關闔是也守土者宜早加之意矣

又西北曰博羅和洛之山鄂拓克賽里之水出焉北流  
入於薩爾巴克圖之河

西域圖志博羅和洛鄂拉在塔勒奇鄂拉南谷口  
西北一百里博羅塔拉西二百里鄂拓克賽里郭  
勒發源東麓博羅和洛及烘郭爾鄂博爲博羅塔  
拉之西屏

西域水道記鄂拓克賽里河賽喇木淖爾西北博  
羅和洛山準語山峰蒼翠回抱如牆故名東流經

喀喇河北岸又東北經熱泉南又東北經鄂拓克

賽里卡倫南西距雅瑪爾圖卡倫一百四十里乾隆二十三年定邊將

軍兆公惠等奏言臣策布登扎布過甘楚罕今作甘珠罕有

卡倫在賽喇木淖爾東岸直尋布庫察游牧臣富德紆道一日前往

鄂拓克賽里堵截約於塔勒奇相會是其地矣準

語鄂拓克部落也賽里後勝也河有分流如勝故

人名

案準語博羅青也和洛遠也一作博羅霍洛新

疆圖說云鄂托克賽里水在精河城西北三百

九十里其源出卡旁泉穴北流三十里至大新

喀喇伏於破城草場此謂卡倫所出之水與水

道記不合西域圖志云鄂拓克賽里郭勒西北

行一百里又合罕哈爾察海所出之河匯而東

流三十里為博羅塔拉郭勒案此水入薩爾巴

克圖河又東流即為博羅塔拉河矣乾隆二十

二年定邊將軍成袞扎布奏侍衛烏爾登於六

月初九日追賊尼瑪等由博羅和洛山口往哈

什河源一路山險雪融泥淖難行即此山也

又西曰烘郭爾鄂博之山產煤

西域圖志烘郭爾鄂博鄂博謂壘石為祭處在博羅和洛鄂拉

西南山脈自額布圖分支西行至此又分二支其  
東北一支繞博羅塔拉西北折而東行至鄂爾和  
楚克鄂拉與阿勒坦西來之山脈相接乾隆二十  
八年秩於祀典每歲春秋致祭

西域水道記伊犁河西過烘郭爾鄂博山南準語  
謂黃曰烘郭爾言壘石處黃色也山東與阿里瑪  
圖山接西至惠遠城北十五里而止乾隆二十三  
年定邊將軍兆公惠奏捉生詢問言特古斯孟克  
與昂吉岱屬人齊默特等同行至烘郭爾鄂博遇  
哈薩克哨探兵五十餘人擒特古斯孟克去蓋昂

吉岱先由阿圭雅斯遁於沙喇伯勒又由沙喇伯  
勒渡伊犁河至濟爾噶朗今圖作吉里格朗故經烘郭爾鄂

博矣山產煤今存礦三十四所恒充伊犁九城用  
山之西麓曰紅山嶺在惠遠城東北二十里每冬習礮所也乾

隆二十八年始秩祀山南距河四十餘里烘郭爾鄂博山層疊  
而北迄於卻羅嶺卻羅嶺北與瑚素圖布克軍台相望南為畢齊克圖又南為庫克哈瑪爾又南為阿里瑪圖

凡百二三十里卻羅嶺西接塔勒奇嶺乾隆二十  
年定邊左副將軍阿睦爾撒納疏報有額林哈畢  
爾噶宰桑阿巴噶斯等來降詢知去年十月巴特  
瑪車凌句額林沁句阿布賚領厄魯特哈薩克兵

萬餘將博羅塔拉等處游牧人家盡行搶掠阿布  
賚於塔勒奇嶺東將擄掠人帶回巴特瑪車凌額  
林沁帶兵四千餘人入伊犁達瓦齊拒之所謂塔  
勒奇嶺東卽接卻羅嶺處也

案烘郭爾鄂博或作匡果羅鄂博鄒氏約說云  
自匡果羅鄂博山向東偏北十五度三十分迤  
四十八里爲別珍套山口

又北曰薩勒巴圖烏蘭布喇之嶺  
西域圖志薩勒巴圖烏蘭布喇達巴在博羅和洛  
鄂拉西北一百里博羅塔拉西

案薩勒巴圖烏蘭布喇當卽新疆圖說之遐拉  
布拉可在別珍島之東

又西曰喀三之嶺枯婁本水出焉北流入於博羅塔拉  
河

新疆圖說喀三達坂在精河城西北五百八十里  
爲中俄分界二十六號牌博

案伊犁鄉土志二十六號牌博在別珍島山西  
灣康喀達巴罕康喀卽喀三也

又西北曰庫克烏蘇之山博羅塔拉河水出焉  
新疆圖說庫克烏蘇山在精河城西北六百五里

山脈五  
為中俄分界二十七號牌博

案鄒氏約說云界自庫克烏蘇南偏東三十二

度三十分迤二十里為別珍套山西陲即同治

三年約所言之薩爾巴克圖河

即博羅塔拉河

庫克鄂羅

木河

即庫克烏蘇又作闊克蘇

奎屯河

即烏斜克

三水發源之匡果羅鄂

博也

又東北曰得木克之山其東枯婁本烏蘇白勒杞之水出焉其南庫克烏蘇之水出焉均南流入於博羅塔拉河

新疆圖說得木克山在精河城西北六百二十里

為中俄分界二十八號牌博西接阿拉圖嶺為俄

七河省界

案得木克伊犁鄉土志作高德木或作德木克

鄒氏約說云界自德木克達坂東偏南二十六

度三十分迤十四里為庫克烏蘇

又東北曰薩爾堪斯克之山薩爾堪斯克水出焉東南流入於博羅塔拉河

新疆圖說薩爾堪斯克山在精河城西北五百九

十里為中俄分界二十九號牌博薩爾堪斯克水

有二支卡東曰耶里肯布拉克卡西曰白克怎布

拉克均東南流五十里與博羅塔拉河會鄒氏約  
說云界自薩爾堪山口南偏西四十一度迤二十  
四里爲德木克達坂

又東曰巴爾堪斯克之山札圖木欽之水鄂里吐里克  
之水出焉均南流五十里入於博羅塔拉河

新疆圖說巴爾堪斯克山在精河城西北五百六  
十里爲中俄分界三十號牌博

案薩爾堪斯克洪圖作薩爾堪巴爾堪斯克洪  
圖作巴斯堪兩山口統屬罕喀爾察蓋山罕喀  
爾察蓋卽西域圖志之罕哈爾察海在博羅和

洛山北二百里當博羅塔拉之西北境以上兩  
山蓋罕哈爾察海山之隨地異名者鄒氏約說  
云界自巴斯堪山口西徧南二十度三十分迤  
六十里爲薩爾堪山口卽薩爾坎

又東北曰庫克托木之嶺有水焉東南流入於博羅塔  
拉河

西域圖志庫克托木達巴在罕哈爾察海鄂拉東  
北博羅塔拉北

西域水道記庫克托木水發自庫克托木嶺乾隆  
二十六年叅贊阿公桂奏言哈薩克越界遊牧派

伊勒圖豐訥亨領兵三百餘名踰庫克托木嶺將  
潛來巴柴勒卜什之哈薩克拏獲三四人收其馬  
羣卽此水所源也

新疆圖說托木山在精河城西北四百七十里山  
在庫克托木卡正北爲中俄分界三十一號牌博  
北爲俄七河省屬

又東曰托洛梗之山

新疆圖說托洛梗山在精河城西北四百一十里  
山南爲喀喇烏蘇布克升卡西距庫克托木卡七  
十里

又東曰索嶺有水焉西南流入於博羅塔拉之河

新疆圖說索達坂在精河城西北三百三十里  
西域水道記莎嶺水出莎嶺北流入於博羅塔拉  
河東逕察哈爾右翼廟北又東逕右翼倉南又東  
逕右翼田南皆察哈爾遊牧也

案莎嶺卽索嶺準語索臂膀也嶺形如之故名  
索達坂爲中俄分界三十二號牌博處在精河  
城西北三百二十里設有卡倫西距庫克托木  
卡一百三十里

又東曰阿勒坦特布什之山



西域圖志阿勒坦特布什鄂拉在罕哈爾察海鄂拉東二百里博羅塔拉東北一百五十里舊為準噶爾塔爾巴哈沁部遊牧處賽音伯勒克之昂吉宰桑烏魯木齊亦遊牧其地乾隆二十年大兵進討伊犁烏魯木以四百餘戶內附

一統志阿勒坦特布什山在伊犁東北

案阿勒坦特布什沙喇扣肯傳作阿勒坦特卜什為當日阿睦爾撒納竄據之地

那林哈勒噶山

勘界日記光緒八年七月二日由南山口鹽海岸

向南行過帖克斯川水東流至帖克斯計程百里厄魯特蒙古集居山口草木暢茂西南上帖克斯即特克斯卡倫山名巴音果里山初七日由帖克斯向東南行至納林廓勒計程十五里南行即納林哈勒噶山再向東行六十里至木素爾山口

案北路中俄分界以那林哈勒噶卡為第一牌博在綏定城南八百一十五里為甯遠界內之山由此而北至莫霍托羅海第十一號界牌皆甯遠轄境

諾海托蓋山

新疆圖說諾海托蓋山亦名蛇頭山在綏定城西  
南五百八十里爲甯遠界內中俄第六號牌博特  
克斯河由此入境經山陰東流

阿圭雅斯山阿圭雅斯水出焉東北流入於特克斯  
河

西域水道記阿圭雅斯水發自阿圭雅斯山乾隆  
二十二年定邊將軍成袞扎布奏言臣等自裕勒  
都斯起程策應明瑞七月初二日明瑞越高嶺數  
處行兩晝夜至布昆哈瑪爾問知綽和爾等渡庫  
克烏蘇糾合昂吉岱等盤踞阿圭雅斯山中伏賊

於密林以待因遣兵截去路賊見兵勢卽逃追至  
葉克特里克嶺賊依山結寨石峯林立冰雪堆積  
馬乏難行不能奪取暫於明布拉克回語明千數名  
也地泉多故名駐  
劄是知阿圭雅斯所源固林菁阻深矣水東北流  
滙於阿特克斯河

案阿圭雅斯新疆圖說作阿古雅斯水在綏定  
城南五百七十里源出阿克達坂東北流一百  
里與特克斯河會阿克阿古皆阿圭之轉音在  
察罕烏蘇水東爲木素爾山之分支

達哈岱烏拉山

西域水道記吉爾瑪台水與哈畢斯朗水皆流經  
達哈岱烏拉山西南以匯庫克烏蘇庫克烏蘇北  
流入特克斯河河逕達哈岱烏拉山北三濟爾噶  
朗水來匯又東北則昌曼河也

案那林哈勒噶山諾海托蓋山阿圭雅斯山均  
在特克斯河之南

丹布哈什山

新疆圖說丹布哈什山在甯遠城東三百六十里

案丹布哈什山在空格斯河南昌曼河北

烏努古特嶺

新疆圖說烏努古特山在喀喇沙爾城西北七百  
三十里

案烏努古特嶺在昌曼河之北空格斯河之南  
東南距納喇特嶺六十里

格登山格登之水出焉東南流入於特克斯河

新疆圖說格登山在綏定城南四百四十里

西域圖志乾隆二十年五月將軍班第等平伊犁  
達瓦齊以萬餘眾西走保格登鄂拉後踞山根前  
臨泥淖西北兩路官兵各據形勢整陣以待十四  
日遣翼長阿玉錫厄魯特章京巴圖濟爾噶爾宰

桑察哈什等以銳兵二十二人夜襲達瓦齊將及阿玉錫突入其營槍矢並發聲震山谷出賊不意乃大潰亂自相蹂躪無一人敢撻吾鋒者擒其台吉二十宰桑四宰桑子弟二十五人達瓦齊率其濟拉特怯五百餘所部兵二千諸鄂托克兵四千餘竄至黎明悉收撫之達瓦齊僅以身免是役也以二十二人敗六千餘眾阿玉錫之功居最焉且手撤達瓦齊所居帳及礮六位而還 天子壯其勇作阿玉錫歌製紀功碑文勒石山岩乾隆二十五年遣官致祭每歲春秋秩於祭典

西域水道記格登山在惠遠城西南五百餘里北距格根河源八十餘里昔大軍之追擒達瓦齊也達瓦齊自特克斯河竄據格登山乾隆二十年五月十四日翼領喀喇巴圖魯阿玉錫等帶兵二十二人突入賊營放鎗吶喊賊眾驚潰達瓦齊率二十餘人竄去叅贊大臣公達爾黨阿追躡至庫魯克嶺達瓦齊入布魯特境六月八日達瓦齊竄至喀什噶爾界圖爾瑪阿奇木伯克霍集斯遣其弟携酒馬迎勞伏兵林內擒之並獲其子羅卜托宰桑受爾齊等七十人副都統額爾登額往木素爾

受其獻迨定伊犁立方碑格登山巔四面分勒滿  
漢書回部書唐古忒書以名功焉二十五年伊犁  
辦事大臣阿公桂疏以格登爲伊犁鎮山歲祀著  
爲令格登水並山流所謂前臨泥淖者也又東南  
與阿爾班水滙復東南滙於特克斯河余乙亥歲  
除宿於沙圖阿璊軍臺臺倚水側隔岸葱鬱谷口  
東眺遠見格登雪氣不寒檉樺萌茁氈廬燭炮殘  
杯不乾澗聲淙淙胡歌四面歲暮崢嶸泣數行下  
異鄉之悲至斯已極

勘定新疆記光緒八年七月將軍長順勘分伊犁

中段馳會俄官佛哩德自伊犁西南天山北麓那  
林塔勒噶山口起至伊犁境東北喀拉達坂止沿  
邊履勘逐段建立界博九月中旬一律完竣惟距  
那林東北百餘里格登山有 高宗純皇帝乾隆  
二十年勦平準夷銘勳碑記深懼淪胥考核新圖  
未載山名檢查同治三年俄人輿圖此山已劃歸  
俄壤遂結營山下與俄官往復力商始允自特克  
斯河劃格登山一隅仍屬中土長約五六十里寬  
稍殺之當卽會立界博

勘界日記光緒八年由綏定起程行二十餘里渡

伊犁河二十三日向西南行四十里至錫伯頭牛  
彖營堡又行十里住馬二十五日行百一十里住  
南山下回部牧所地名克特滿二十六日南行入  
山口至達坂腳下山勢嵯峨松叢草茂澗徑褊窄  
溪水北流馬行車阻計程四十里二十七日南行  
至達坂頂其西南一峯白雪覆泉兩面流分順澗  
出口聲勢漸大一路危巖峭壁雲生馬首山陰松  
柏蕃茂布魯特游牧多在山麓傍午煙嵐朗霽渾  
忘炎暑計山行四十里二十九日南行出谷口至  
依斯布魯特計程五十里北山名阿克塔什島南

山名格根山二山東西相隔十里道由中行布魯  
特星居山谷水向西流仍係達坂澗壑一派出壑  
則由平地西漾名格根河入沙伏行數里出則復  
汨汨西流矣光緒九年十月返渡冰嶺二十一日  
由峽台渡河出口百里至根梁台南則汗騰格里  
山西北約二十餘里卽格登山也絕頂有 高宗  
純皇帝御製碑平定準噶爾勅勒去歲長大臣由  
此山迤北勘分苟非理索竟爲俄有因衝寒策馬  
匍匐仰瞻焉

伊犁鄉土志格登山在伊犁府城西南卽今額魯

特上三旂游牧地方中俄分界新立第七號牌博處

案格登山一作格根山準語腦後骨高之象山形拱起如腦骨故名西域圖志誤以伊犁河北之格登山爲此勒石紀功之格登一統志亦沿其誤南北刺謬奚啻千里西域水道記及沙大  
臣勘界日記均身歷其地言之甚詳同治初陷入俄疆光緒八年分界之時再三爭議久之而後一卷之石復歸於我烏庫自中俄分界以來西北山川蹙削數千餘里而格登以碑故僅存

所謂能讓千乘之國而見色於豆羹簞食者也  
喀什嶺喀什水出焉東南流入於特克斯河

西域水道記喀什水發於喀什嶺在惠遠城西南二百里重岡複嶂高六十餘里水發其陽南流經博羅哈瑪爾山諺曰青石梁又東南滙於特克斯河

伊犁鄉土志喀什達坂卽今額魯特上三旂游牧地方中俄分界第十號牌博處

案新疆圖說喀什水亦名哈三出山南流七十里與特克斯河會

沙喇諾海嶺有水焉南流入於特克斯河

西域水道記沙喇諾海水發自沙喇諾海嶺南流

至博羅哈瑪爾山北烏蘭布拉克水即烏拉拉克自西北

來滙同流經博羅哈瑪爾東又東南入特克斯河

伊犁鄉土志沙喇諾海達坂在哈什達坂東南距

府城東南一百三十餘里

案新疆圖說沙喇諾海山所出之水尙有月爾

圖水小哈爾干圖水大哈爾干圖水均南流入

於特克斯河

沙拉套山

新疆圖說沙拉套山在綏定城南二百四十里

案沙拉套山為中俄分界第九號牌博

喀拉套山洪海水出焉北流七十里分溉莊田

新疆圖說喀拉套山在綏定城南一百八十里

烏宗島有水焉北流分溉莊田

新疆圖說烏宗島在綏定城南一百八十里冲布

莊水大博羅莊水小博羅莊水霍洛海莊水均出

其麓

色格三嶺有水焉北流溉田入於地

新疆圖說色格三達坂在綏定城南二百九十里



車濟水烏蘭哈太水札胡斯太水均出其麓  
華諾輝嶺華諾輝水出焉南流入於特克斯河有鳥  
焉如燕而小巢於冰窟名曰冰雀

西域水道記伊克華諾輝水巴噶華諾輝水皆發  
自華諾輝嶺山與和濟格爾相直乾隆二十三年  
定邊將軍兆公惠奏言於華諾輝山口對面之和  
濟格爾收取杜爾把集賽得木齊伊什博什等六  
十八口是也伊克華諾輝水南流經銅廠西伊犁  
銅廠創立於乾隆四十一年次年於哈爾罕圖諺  
鳳皇山在惠遠城南四百五十里置廠所謂舊銅廠也五十六年將軍

保公甯以礦竭移廠哈什嘉慶六年又自哈什移

於巴彥岱呼巴海蒙古語巴彥謂富者呼巴海無草木也諺名曰三道溝卽伊克華

諾輝水所經也華諾輝水又西南流由華諾輝谷  
中行谷長五六里怪石對峙杉松蒼翠嚴寒行役  
乘馬踏冰水流冰下聲益澎湃有小鳥如燕翱翔  
冰上名曰冰雀亦曰雪燕殼乳冰窟亦雪蛆冰蠶  
之儔矣水至谷外西南流二十餘里經華諾輝軍  
臺西距特克斯台一百里巴噶華諾輝水自東來滙共南流至  
胡都爾海入特克斯河

案華諾輝新疆圖說作霍洛海今皆謂之銅山

自伊犁底臺南至霍洛海臺四百里

阿唐山阿唐水出焉南流入於特克斯河

伊犁鄉土志阿唐山在特克斯河北岸距府城東南二百三十餘里

案阿唐山北與華諾輝相接

博爾山博爾水出焉東南流入於特克斯河

西域水道記博爾水發自博爾山伊克博爾巴噶博爾兩山相比地有回民屯田引博爾水溉之

案博爾山在華諾輝嶺東南博爾軍臺距綏定城三百里

索果爾嶺索果爾水出焉其陰產鐵

西域水道記莎水發自莎嶺嶺在惠遠城東南二百五十里產鐵乾隆三十八年將軍舒公赫德疏言伊犁種田回民銷買舊鐵製作耕具數年以來收買殆盡於伊犁河南莎嶺開礦調阿克蘇城回民三十戶試探迄今山陰置廠焉廠北二十里為莎郭勒軍臺距博爾軍臺八十里自軍臺南行二十許里踰嶺嶺高二十許里余曾登陟嗟峨有馬瘡之歎

案索果爾嶺即莎嶺新疆圖說作索達坂索果爾水亦名察布察爾水源出於此北流二十里至索果爾

山脈五  
軍臺即莎郭勒軍臺折而西北流六十里至坎莊分溉地  
畝索水源亦出索達坂東南六十里與哈拉哈  
土水會入於特克斯河其嶺在博爾山之北索  
果爾軍臺南二十里距綏定城二百四十里  
察布察爾山有水焉北流溉民田

西域水道記察布察爾山口東距雅瑪圖嶺七十  
里察布察爾水發焉乾隆二十三年副都統由屯  
追鄂哲特帶兵二百餘名三月二十一日戰賊眾  
於察布察爾河口之蘇瑪爾罕奪其所據山谷道  
殺二百餘人於特克斯河乾隆三十年移盛京錫

木伯部官兵千一十八人駐伊犁河南岸嘉慶初部  
人圖默特創議於察布察爾山口引水自崖上鑿  
渠東西長二百餘里數年功成闢田千頃遂大豐  
殖雄視諸部鄭白之沃不足云也

案察布察爾新疆圖說作恰布恰倫在伊犁河  
南

雅瑪圖嶺有水焉北流遇沙而伏

西域水道記喀什河西南流經雅瑪圖嶺北嶺西  
十餘里有舊鉛廠喀什河直鉛廠之北匯伊犁河  
乾隆二十一年定西將軍策楞奏侍衛福昭等訛

言台吉諾爾布於正月二十一日在雅瑪圖嶺擒  
阿逆卽其處也

沙拉博霍齊嶺有水焉南流注於特克斯河

西域水道記伊犁河西北流逕沙喇博霍齊嶺北  
蒙古語博霍齊牝牛也謂山形如黃牝牛嶺有水  
北流漑回莊而止

案沙拉博霍齊嶺在雅瑪圖嶺東南木尼克得  
之西新疆圖說云咸曼水沙喇博霍齊水皆出  
山南入特克斯河

木尼克得山

新疆圖說木尼克得山在綏定城東南三百八十  
里特克斯河東流至木尼克得山觜渡口折西北  
流四十里至額林哈必爾山與空格斯會自此以  
西是爲伊犁大河

案西域水道記云特克斯河逕莫紐庫尊嶺烏  
蘭布罕西里山西凡六十餘里至河口莫紐庫  
尊卽木尼克得也自格登以下諸山至此皆在  
特克斯河之北

阿爾察圖山察罕烏蘇之水出焉西南流入於空格  
斯河

西域水道記察罕烏蘇發自阿爾察圖山蒙古語  
有松樹枝也乾隆二十二年副都統由屯擒扎那  
噶爾布七月初一日行至喀什河獲尼瑪屬人俾  
爲嚮導次日黎明到喀什河之阿爾察圖山口分  
兩翼圍游牧賊潰蓋山之北卽喀什河也

察爾圖嶺有水焉南流入於空格斯河

西域水道記空格斯河西北流逕察爾圖嶺南其  
嶺有泉自北來入之又西北流拜牲圖水自南來  
入之又西北逕哲克圖嶺南其嶺水自北來入之  
又西北流昌曼河自南來會

特穆爾里克嶺有水焉南北分流入於河

西域水道記空格斯河經特穆爾里克嶺南其嶺  
水自北來入之特穆爾里克嶺巨空格斯喀什兩  
河間嶺陽之水入空格斯嶺陰之水入喀什河自  
原及委山徑可通車布登扎布傳云阿睦爾撒納  
竄死逸賊阿巴噶斯等未就獲車布登扎布遣兵  
赴喀什空格斯搜逸賊蓋林莽重複足爲逋逃淵  
藪

案特穆爾里克新疆圖說作帖木里克在巴爾  
加圖水之東南

呼賴特穆爾里克嶺

西域水道記喀什河經齊爾哈納托海營南隔岸爲呼賴特穆爾里克嶺嶺趨而北河漸隘西流入峽又西流十里經胡吉爾台嶺哈克布阻水自北來滙南北山勢復開

案胡吉爾台嶺在喀什河南岸東與呼賴特穆爾里克嶺相接隔河北岸卽喀什圍場山也

胡吉爾台嶺有水焉北流入於喀什河

西域水道記空格斯河西北流逕胡吉爾台北胡吉爾蒙古語謂确也地有三泉皆北流嘉慶十七

年正月二十有五日時加戌亥伊犁地震袁佐特哈胡吉爾台山裂四處長二十里至六十里寬五六釐深十餘丈至二十丈又於平地湧出高阜其土虛浮踐之卽陷臨風搖動數十日乃止人畜死者無算卽空格斯河北岸也

案胡吉爾台新疆圖說作胡吉爾大在烏土嶺東北

烏土嶺烏土諸水出焉

新疆圖說烏土達坂在甯遠城東三百里

案烏土嶺在額林哈必爾山東額布圖嶺之支

山脈五  
峯也牙巴代布拉克水則格格水博克而羅各  
水霍爾懷水納林古魯木水浣烏納斯太水于  
浣布拉克水皆出此山牙巴代布拉克水西北  
流與喀什河會則格格諸水均南流入於空格  
斯河西域水道記云喀什河傍南山流其南山  
曰烏圖嶺卽此越烏圖嶺西北行二十里渡哈  
什河河北岸渡口曰察罕拜牲自此西北行五  
十里卽都爾伯勒津回莊也

額林哈必爾山冲吉水出焉西北流入於喀什河  
新疆圖說額林哈必爾山在甯遠城東二百四十

里

伊犁鄉土志額林哈畢爾在府城東南三百三十  
餘里山陽爲耶里格地方山陰爲冲吉村莊爲甯  
遠縣屬境

案額林哈必爾山在克里克子山東

克里克子嶺

新疆圖說克里克子達坂在甯遠城東二百里

案克里克子嶺在阿布喇勒山東

阿布喇勒山其樹多杉松

西域圖志阿布喇勒鄂拉在博羅布爾噶蘇鄂拉

南由天山正榦之額布圖達巴分支迤西北行在  
喀什郭勒空格斯郭勒兩河環帶間當伊犁正東  
面乾隆二十八年秩於祀典每歲春秋致祭

西域水道記阿布喇勒山在惠寧城正東一作阿  
布蘭山蓋音之轉自城闔東眺孤嶂高聳眾峯皆  
斷故諺曰獨山乾隆二十八年將軍明瑞建伊犁  
城卽取此山之木

新疆圖說阿布喇勒山在寧遠城東一百四十里  
俗名獨山子爲將軍班第叅贊大臣鄂容安雙裂  
殉節處

案阿布喇勒山伊犁鄉土志作阿布拉爾山在  
完達拉山東皆伊犁城之東屏班將軍鄂叅贊  
殉節處據方略在阿布喇勒山西之烏蘭庫圖  
勒嶺圖說非也乾隆四十三年班公之子福祿  
於渾都賴山建立雙碑尤爲失實

### 烏蘭庫圖勒嶺

西域水道記喀什河又西經烏蘭庫圖勒嶺北按  
方略乾隆二十年九月叅贊大臣策楞奏宰桑克  
什木等搶掠臺站八月二十九日至烏蘭庫圖勒  
圍守將軍大臣班將軍鄂叅贊俱自盡薩將軍由



小路帶達什達瓦兵百人脫去又班第傳云班第與鄂容安陷賊中由固勒札赴空格斯轉戰至烏蘭庫圖勒賊蜂集力不支遂各自盡是一公殉節之地載在冊書變亂之後傳聞失實以為在渾都賴山故樹碑於彼而烏蘭庫圖勒反為射雉場無茅蕝以棲忠魂策馬留連愴焉悲楚余為詩正之烏蘭嶺

西域水道記喀什河又西經烏蘭嶺北車布登傳云附錫布推哈坦巴圖爾傳和託輝特逆賊青滾雜卜叛車布登將以兵會參贊塔爾瑪善赴烏蘭嶺追勦阿睦爾撒

納謂此嶺矣

案特穆爾里克嶺呼賴特穆爾里克嶺烏土嶺額林哈必爾山克里克子嶺阿布喇勒山烏蘭庫圖勒嶺烏蘭嶺皆額布圖嶺分支西行者在美喀什空格斯兩河之間

渾都賴山溫泉出焉

西域水道記喀什河匯烏里雅蘇圖水西南流七十餘里經渾都賴山南山麓有溫泉以木為檻行役往來於斯澡浴山陰即博羅布爾噶蘇之營也博羅布爾噶蘇山自營北周其西以屬於渾都賴

山脈五  
渾都賴山與南山相逼東河如堵墻喀什河西流  
五里淵深渟滯北出其隘復西流其北岸卽俗傳  
雙裂効命處乾隆四十三年班公之子福祿成伊  
犁公之孫慶麟亦來爲厄魯特營領隊未稽圖史  
遂於其地建立方碑並立鄂公碑一通河流經班  
義烈公碑南又西數十步經鄂剛烈公碑南又北  
流而西南十餘里渾都賴山勢向盡  
案渾都賴山新疆圖說作完達拉山在喀什伊  
犁兩河之間西域水道記圖亦在兩河間相會  
處而記則謂在喀什河北殊自牴也

克里則嶺

案克里則嶺在喀什河北喀什回莊之東

托拔嶺

案托拔嶺在喀什河北合洛斯台水之東喀什

河折而南流之處

關里沁山沁水出焉

西域水道記甯遠城北百餘里有關里沁山沁水

發焉東距濟爾噶朗河五十餘里南流經關里沁

卡倫卡倫在惠寧城東北三十餘里北折而流經其西西南流經舊渠

口舊渠者關里沁水故道至此分爲渠也

案新疆圖說闐里沁水在甯遠城北五十里源  
出庫森木什達坂東大山南流一百里分漑村  
莊地畝其所謂東大山即闐里沁山也沁水分  
渠南流亦入伊犁大河

毛海圖山毛海圖水出焉

西域水道記阿里瑪圖水東闐里沁水西為毛海  
圖山亦有水南流而止毛海圖山北數十里為庫  
克哈瑪爾將軍牧場也

案新疆圖說磨合圖水在甯遠城西北七十里  
源出庫森木什達坂南流六十里分漑回莊地

畝磨合圖即毛海圖之轉音也

已上甯遠境內支山

阿里瑪圖山阿里瑪圖水出焉

西域水道記惠甯城北為阿里瑪圖山準語阿里  
瑪謂果樹也地多果樹阿里瑪圖水發焉是為東  
阿里瑪圖水曩者水達伊犁河今引漑惠甯城西  
旗堡田無餘水乾隆二十八年秩祀阿里瑪圖河  
案新疆圖說云東阿里瑪圖水在甯遠城西北  
一百里源出庫森木什達坂蓋自合洛斯太以  
下諸水所出之山統謂之庫森木什嶺也阿里

瑪者土人呼果之語山多果實故名

新開嶺白楊溝水出焉

新疆圖說新開達坂在綏定城東北一百里白楊溝水出新開達坂西南流五十里與烏哈里克水會烏哈里克水源出庫森木什達坂南入伊犁河紅山科河之水出焉

新疆圖說紅山在綏定城西一百七十里其卡為中俄界光緒九年索倫營新設科河水源出紅山口卡東山南流二十里分一支曰西阿里瑪圖水南流五十里經索倫營引水灌地

別珍島有水焉北流入於博羅塔拉河

案別珍島伊犁鄉土志作別克津達坂在伊犁西北精河西北五百七十里為綏定精河二處界山山陰所出之水曰麻相布拉可曰白可進布拉克均北流與博羅塔拉河會霍爾果斯河亦出別珍島南流入於伊犁河

已上綏定境內支山

遐里巴各土山

案遐里巴各土山在雅里阿山東

雅里阿土山

案雅里阿土山在雅瑪圖卡之東

托羅各特嶺有水焉北流伏於地

新疆圖說托羅各特達坂在精河城西南一百四十里烏拉斯台水戾勒黑水胡吉冷白黑坦水均北流伏於草場戈壁

登努勒台山合洛斯水出焉東南流注於博羅布爾噶蘇河

西域水道記伊犁喀什河北岸山有峽口曰登努

勒台安阜城東五十里地曰沙泉子沙泉子正南與登努勒台山口相直在博羅布爾噶蘇山

西兆公惠會由此進兵故安阜城南十里有兆將

軍廢壘山有水西南流為呼魯蘇台水又西曰明

瑪魯山有水南流為畢立海水又西十餘里山亦

有水南流為渠立海水二水皆會於呼魯蘇台水

溉回莊田

新疆圖說精河城西南至登努勒台一百二十里與甯遠屬喀什山連界

案新疆圖說合洛斯水出登努勒台山合洛斯

太水出庫森木什達坂水道記之呼魯蘇台即

合洛斯太非出於登努勒台山者今圖之覺洛

海水即畢立海水黑子布拉克即渠立海水二

水皆出於庫森木什達坂登努勒台所出之水  
合洛斯外又有沙拉改水在合洛斯水之西合  
洛斯水東南流六十里與博羅布爾噶蘇水匯  
非與覺洛海諸水匯也登努勒台山陰之水曰  
東托各斯台水北流伏於戈壁

### 烏蘭嶺

新疆圖說烏蘭達坂在精河城西南八十里  
哈拉嶺布哈水出焉西南流入於博羅塔拉河  
新疆圖說哈拉達坂在精河城西南六十餘里布  
哈水源出此山西南流二百里入博羅塔拉河

### 布里沁嶺

新疆圖說布里沁達坂在精河城南一百一十里  
已上精河境內支山

### 山脈志卷五終

山月志卷五

市里

白土

海國

市里

